

Résumé

KHUTBAH JUMMAH

PAR LAJNA IMA'ILLAH ILE MAURICE

Pour tous commentaires ek suggestions, envoye nous ène email à l'adresse ishaatlajnamu@gmail.com

SOMMAIRE


Exploits des musulmans et musulmanes à Ouhoud 02

Courage exemplaire des musulmanes 03

Comment profiter du Ramadan 04

Le Coran : le pilier du Ramadan 05

La prière l'arme ultime 06



Huzur (atba) finne présente ene extrait kot Hazrat Musleh Maoud (ra) finne dire ki banne ki ti bléssé dans la bataille ti récévoir banne soins alors ki banne ki ti tombe en martyr ti enterré. Huzur (atba) dire ki ti finne recouvert Hazrat Hamzah (ra) so le corps avec 1 sel boute la toile. Le Saint Prophete (saw) ti interdit lamentation et pleurer fort fort après ene décès dans ene façon rempli avec sagesse.

Huzur (atba) dire ki après bataille Uhud, le Saint Prophète (saw) ine faire ene dua. Li ti demande bannes musulmans pou débouter en rang derrière li et line demande Allah pou avoy banne tel bénédictions, ki jamais pou kapave enlevées depi lor la terre. Li finne demande dua pou ki ena la paix pendant le Jour du Jugement. Li finne faire dua pou zotte ress proteger contre tout kitsoz ki malsain. Li finne faire duah pou ki la foi vinne ene kitsoz ki ena buku valeur pou zot et ki tous banne mauvais kitsoz vinne detestable. Nabi Kareem (saw) finne aussi faire dua pou ki zotte mort en tant ki croyant et ki zotte ress vivant dans ene l'état de bannes croyants. Li finne faire dua pou détruire tou bannes ki rejette bannes prophètes et ki bannes incroyants zotte ruinés.

Ensuite, Huzur (atba) dire ki bannes Compagnons madames aussi ti zuer ene grand rôle pendant bataille Uhud. Finne rapporter ki Hazrat Umm Salamah (ra) ti prend part dans bataille Uhud. Kan le Saint Prophete (saw) ti en route pou bataille Uhud, arrive ene moment li ti arrêter pou reposer et lerala Hazrat Umm Salamah (ra) ine amène manzer pou li. Finne rapporter ki pendant bataille, Hazrat A'ishah (ra) et Hazrat Umm Sulaim (ra) ti pe amène delo pou bannes musulmans.

Huzur (atba) dire ki Sa'd (ra) ti faire serment ki soi li pou réussi tuer l'ennemi, soi li pou tombe en martyr lor champs de bataille. Pendant bataille, li finne trouver ki l'ennemi ti sur le point pou gagne le dessus lor kikene et a sa moment la, li finne ramasse imper roches et li finne envoie sa lor l'ennemi la. Kan Sa'd (ra) finne demander kisanla sa, finne dire li ki c'est le Saint Prophete (saw) et ki le Saint Prophete (saw) pé appelle li. Li finne donc alle kot le Saint Prophete (saw). Sa'd finne mette li même devant Nabi Kareem (saw) et finne commence tire banne flèches. En même temps, li ti pé faire sa duah la : 'O Allah, ca flèche la li appartenir a Toi. Faire ki li atteigne l'ennemi'. En même temps, le Saint Prophete (saw) ti pé faire sa duah la : 'O Allah, accepter Sa'd so duah. O Allah, augmente Sa'd so precision. O Sa'd, ki mo banne parents sacrifié pou toi.' Kan Sa'd (ra) so banne flèches in fini, le Saint Prophete (saw) li meme ti pé donne li encore flèches. Parmi sa banne fleches la, ti ena ene ki pas ti même ena sa boutte pointe par devant la. Seulement, kan finne geter, sa meme fleche ti alle avec plis vitesse parmi tous banne fleches ki ti ena. Rapporté ki sa jour la, Sa'd (ra) finne tire 1000 fleches.

Ensuite, Huzur (atba) finne présente ene extrait kot Hazrat Mirza Bashir Ahmad (ra) écrire ki:

'Kan le Saint Prophete (saw) finne arrive kot sa la passe montagne la, ene groupe de banne l'ennemis, avec a la tete, Khalid bin Walid, finne essaie monte montagne la et lance ene l'attaque, mais Hazrat Umar (ra) et quelques Muharijin finne repousse zot l'attaque suite a banne instructions de Nabi Kareem (saw).'

Huzur (atba) dire ki par la grâce d'Allah, le mois de Ramadan in fini kumanser. Le Saint Prophete (saw) dire ki sa mois la, li le mois béni kot Allah envoie so bannes miséricordes en abondance lor So bannes serviteurs- et a travers sa, pendant l'année, Allah accorde bannes faveurs inimaginable. Dans sa mois la, satan finne enchaîner et Allah accorde nous opportunité pou ki nous libère nous même depi satan et donc pena même aucun mots ki kapave décrire sa faveur ki Allah ine faire lor nous la, en accordant sa mois la a bannes musulmans. Kan nous alle vers Allah, Li ouvert la porte de So la grâce encore plus ki avant pou nous.

Huzur (atba) dire ki sa mois la, li ene mois bien spécial parski dans sa mois la, nous kapave récolter buku plus bannes faveurs d'Allah. Si avant ti ena manquements dans nous namaz, dans lire bannes namaz nawafil, faire récitation Qur'an et mette en pratique sa bannes enseignements la, be lerla sa mois la li ene opportunité pou nous accorde plus attention lor nous bannes obligations et faire encore plus adoration d'Allah.

Huzur (atba) dire ki c'est ziss kan nous pou konne servi ene bouclier ki nous kapave tire profit de sa bouclier la. Sinon, satan li attaquer de tous les cotés, be lerla kuma eski nous pou kapave sappe nous mem de so bannes attaques ? Donc, nous bisin faire zeffor pou adopter la droiture, et c'est sa même ki vrai but de garde roza. Nous bisin pas sous-estime satan ; li finne bien clairement défier ki nous pou succomber a so banne tentations et li pou amene nous lor mauvais chemin. Nous bisin ress ferme et déboutter contre sa, c'est lerla ki nous pou prouver ki satan ena tort. Huzur (atba) ine aussi demande pou faire dua pou le monde musulman ; ki Allah accorde zotte sagesse et compréhension et ki zotte accepter le Messie Promis (as) et Mahdi.

Huzur (atba) dire ki le Qur'an finne enseigne nous lor nous devoir pou observe roza et banne lezot moyens pou faire l'adoration. Le fait ki roza li obligatoire ou ki le Qur'an finne révélé dans sa mois la li pas assez pou nous comprend ki l'importance Ramadan vraitement ena. Au contraire, nous bizin faire zefforts pou gagne vrai compréhension de sa livre complet la et faire li vinne ene source de guidance pou nous la vie. En tant ki Ahmadi, nous bien chanceux ki nous finne accepté le Messie Promis (as), ki finne explique nous banne vrai significations et l'essence même du Qur'an. Sa banne significations la, nous kapav gagne sa kan nous lire so banne livres. Huzur (atba) dire ki le Messie Promis (as) ine laisse pou nous plusieurs bannes écrits kott li finne expliker kuma pou profite de bannes bénédictions depi le Saint Coran. C'est zis kan nous pou lire bannes écrits du Messie Promis (as), ki nous pou kapave bénéficier vraiment du Saint Coran. Huzur (atba) dire ki li pou présente quelques bannes extraits de Hazrat Massih Maoud (as).

Huzur (atba) finne avant tout souligne l'importance pou recite le Saint Coran spécialement pendant le mois de Ramadan. Chaque dimoune bisin faire zeffor pou lire au moins ene partie de Quran tous les jours afin ki li kapave complète lecture du Saint Coran pendant Ramadan. L'ange Gabriel ti pe termine le Qur'an ziska boute kot révélation ti arriver la au Saint Prophète (saw). Ensuite, pendant dernier Ramadan du Saint Prophete (saw), l'ange Gabriel ti termine le Quran deux fois, ensam avec le Saint Prophète (saw). Azordi jour, ena ene manquement dans la foi et en fait ena ziss bannes fausse proclamation de la foi. Donc, si nous envi gagne succès, li important ki nous ena vrai la foi et sa kapave gagne sa ziss kan nous pou suivre le Qur'an.

Huzur (atba) dire ki ene fois, le Saint Prophete (saw) finne dire ki Allah traite So banne serviteurs par rapport a considération ki zot ena pou Li (Allah). Si ene dimoune rappelle Allah, be lerla Allah avec sa dimoune la. Si ene dimoune rappelle Allah dans so le cœur, Allah osi rapelle sa dimoune la dans So le cœur. Si ene dimoune rappelle Allah pendant ene rassemblement, Allah osi rapelle li dans ene rassemblement. Si ene dimoune avance vers Allah valeur longueur ene la main, Allah rapproche Li avec sa dimoune la valeur longueur ene le bras. Si ene dimoune avance vers Allah valeur longueur ene le bras, Allah rapproche Li avec sa dimoune la valeur longueur deux les bras. Si ene dimoune marcher pou rapproche li avec Allah, Allah galouper alle vers sa dimoune la. En somme, sa c'est façon ki Allah traite So banne serviteurs dans banne jours normal.

Huzur (atba) dire ki parfois dans presse presser, ene dimoune dire ki zot finne faire duah mais zot duah pas finne accepter. Seulement, zot pas prend le temps pou réfléchi lor niveau sincérité ki zot finne démontrer kan zot finne faire sa duah la ou soit eski zot pé essaie augmente connection ki zot ena avec Allah avec sincérité. Donc, si nou envi gagne So compassion, li important pou accompli So banne commandements. Huzur (atba) dire ki le Messie Promis (as) ine expliker ki sans doute, Allah li tende bannes supplications mais a condition ki ene dimoune établi la droiture et li accepter sans aukene doute ki Allah exister, et de ce fait, son conviction ki Allah Li ena pouvoir lor tous kitsoz li augmenter li aller meme. Le Messie Promis (as) fine dire ki nous bisin développe ene tel niveau dans nous, kot Allah Li koz avec nous. Sa li pou possible kan nous pou établir la droiture et crainte d'Allah, kan nous pou croire fermement dans l'existence d'Allah, kan nous croire dans ceki invisible et nous accepter ki Allah Li ena pouvoir lor tous kitsoz.

**Nous encourage tous ban Lajna et Nasirat
pou suivre Khutba Jummah en direct lor ban
chaines de la MTA**



Click lor ban link en bas pou accéder directement

<http://www.mta.tv/live>

ou

<http://www.mta.tv/live-audio-only>

ou pou Android app

**[https://play.google.com/store/apps/details?
id=tv.mta.apps.muslimtv](https://play.google.com/store/apps/details?id=tv.mta.apps.muslimtv)**

ou pou iPhone app

**[https://apps.apple.com/us/app/mta-
international/id942619881](https://apps.apple.com/us/app/mta-international/id942619881)**

